



Na osnovu čl. 8. 22. i 61. Statuta Samostalnog sindikata radnika u BHRT-u, a u cilju jačanja sistema pravne pomoći za potrebe članova Sindikata, Upravni odbor, na sjednici održanoj u Sarajevu, dana 28.04. 2016. godine donio je

## **PRAVILNIK**

o pružanju pravne pomoći članovima Samostalnog sindikata radnika u BHRT-u.

### **I. OPĆE ODREDBE**

#### **Član 1.**

Upravni odbor Samostalnog sindikata radnika u BHRT-u (u daljem tekstu Upravni odbor) bira iz svog članstva Komisiju od 3 (tri) člana koja zaprima i obrađuje zahtjeve članova Sindikata za pružanje pravne pomoći.

Komisija predlaže, a Upravni odbor na svojim sjednicama donosi odluku o pružanju pravne pomoći članovima Sindikata.

#### **Član 2.**

Pravna pomoć se pruža iz sredstava članarine koja se uplaćuje na račun Sindikata po otkračunu i isplati plaća.

#### **Član 3.**

Od ukupno (100%) prikupljene članarine za 1 (jedan) mjesec, u svrhu pravne pomoći se izdvaja maksimalno 20% iznosa, a ukoliko ta sredstava ne budu dovoljna koristit će se akumulirana sredstva sa računa Sindikata.

#### **Član 4.**

Odluke o pružanju pravne pomoći po pristiglim zahtjevima članova Sindikata usvajaju se jednom mjesečno, nakon uplate članarine na račun Sindikata, ukoliko ih ima.

### **II. KOMISIJA ZA PRAVNU POMOĆ**

#### **Član 5.**

Komisija za pravnu pomoć se formira zbog odlučivanja o opravdanosti zahtjeva za pružanje pravne pomoći članovima Sindikata čija su prava iz rada i na osnovu rada ugrožena ili se krše.

Komisija ima predsjednika i dva člana. Mandat komisije je jedna godina, sa mogućnošću produženja. Članovi komisije mogu dobijati naknadu za svoj rad uz odobrenje Upravnog odbora, ili član koga na prijedlog komisije UO-a ovlasti da prisustvuje i prati disciplinski proces optuženog i to u iznosu od 10 KM za svako ročište. Ukoliko je predstavnik Sindikata sa mjestom prebivališta izvan Sarajeva, UO će svojom odlukom definisati iznos naknade za dolazak na ročište.

### **Član 6.**

Poslovi pravne pomoći obuhvataju zaštitu i ostvarivanje prava članova pred:

1. Disciplinskim tijelom BHRT-a,
2. Sudovima i organima uprave,
3. Tijelima i organima za mirno rješavanje radnih sporova,
4. Drugim organima i organizacijama koji se bave pravnom zaštitom radnika.

### **Član 7.**

Poslovi pravne pomoći, savjetodavne usluge i zastupanje vrše se angažiranjem advokatskih ureda na osnovu ugovora o zastupanju, na prijedlog Komisije.

Člana Sindikata, koji je podnio zahtjev za pravnu pomoć, zastupa pravni zastupnik ili advokat po nalogu Sindikata, ili na lični odabir uz odobrenje UO-a.

## **III. PRAVA I OBAVEZE KORISNIKA PRAVNE POMOĆI**

### **Član 8.**

Pružanje pravne pomoći i zastupanje članova Sindikata ostvaruje se po isteku 6 (šest) mjeseci od dana učlanjenja u Sindikat.

Pravna pomoć i zastupanje iz stava 1. ovog Člana obuhvata:

- Davanje pravnog savjeta i mišljenja u okviru radnog i socijalnog prava, Zastupanje pred Disciplinskim tijelom BHRT-a,
- Zastupanje u radnom sporu pred stvarno i mjesno nadležnim sudom, Izradu tužbe i ostalih podnesaka u radnom sporu,
- Zastupanje člana Sindikata do pravosnažnog okončanja postupka pred sudovima u BiH u okviru radnog prava,
- Izradu tužbi u upravnom sporu pred nadležnim organom u okviru radnog prava,

Član koji primi pravnu pomoć obavezuje se da bude član Sindikata najmanje 12 narednih mjeseci ili da naknadu za pravnu pomoć vrati Sindikatu ako prestaje biti član Sindikata u navedenom periodu. Ukoliko član Sindikata koji je dobio novčanu pomoć po bilo kom osnovu ovog Sindikata odluči da, u roku od 12 (dvanaest) mjeseci od dobivanja pomoći ne bude više član Sindikata, dužan je da cjelokupan iznos dodjeljene pomoći od Sindikata vrati odbijanjem putem platne liste. Nakon izmirenja te obaveze, njegovo članstvo u Sindikatu prestaje. Ova odredba se mora potpisati na ugovoru prilikom preuzimanja pomoći. U slučaju vanrednih okolnosti po člana Sindikata koji je dobio finansijsku pomoć (smrt, otkaz, i sl.), UO može donijeti odluku da se taj član oslobađa od povrata novca koji je dobio od Sindikata.

Članovi Sindikata, koje zastupa pravni zastupnik ili advokat po nalogu Sindikata, dužni su da plate sudske takse po nalogu suda, predujam za izvođenje dokaza vještačenjem, taksu na rješenje o izvršenju i postupak izvršenja, kao i da dosuđene i isplaćene troškove za zastupanje advokata isplate advokatu i Sindikatu, a sve u roku od 8 dana od dana uplate, pod prijetnjom prinudnog izvršenja.

#### **Član 9.**

Pružanje pravne pomoći i zastupanje članova sindikata isključivo se vrši po prethodno dobijenom odobrenju Upravnog odbora, a na prijedlog Komisije.

Uputu za zastupanje potpisuje predsjednik ili potpredsjednici Sindikata, a na ime člana Sindikata kojem je odobrena pravna pomoć.

#### **Član 10.**

U slučaju opoziva punomoćja pravnom zastupniku Sindikata ili zaključivanja poravnjanja bez znanja punomoćnika, u toku trajanja spora, član Sindikata je dužan tražiti saglasnost UO-a Sindikata za promjenu punomoćnika.

#### **Član 11.**

Prilikom angažiranja pravnog zastupnika Sindikata ili advokata, član Sindikata je u obavezi da potpiše Ugovor kojim prihvata uvjete utvrđene članovima 8, 9. i 10. ovog Pravilnika.

#### **Član 12.**

Ugovor o zastupanju koji Sindikat zaključuje sa advokatima, u cilju pravne pomoći i zastupanja članova, zaključuje se shodno advokatskoj tarifi.

Advokat koji je sa Sindikatom zaključio ugovor o zastupanju, po dobijenoj presudi, dužan je da procenat utvrđen zaključenim ugovorom o zastupanju, koji pripada Sindikatu uplati na račun Sindikata u roku od 8 dana, računajući od dana uplate novčanih sredstava na njegov račun.

#### **Član 13.**

Sredstva ostvarena pružanjem pravne pomoći i zastupanjem uplaćuju se na račun Sindikata.

Odluku o raspolaganju sredstvima stava 1. ovog člana donosi Upravni odbor Sindikata.

#### **Član 14.**

Izmjene i dopune ovog pravilnika se vrše na način njegovog donošenja.

#### **Član 15.**

Ovaj Pravilnik stupa na snagu danom donošenja.

Stupanjem na snagu ovog Pravilnika, prestaje da važi Pravilnik o pružanju pravne pomoći članovima Sindikata, broj 08/2015.

U Sarajevu, 28. 04.2016. godine  
Broj: 86/2016

UPRAVNI ODBOR  
SAMOSTALNOG SINDIKATA RADNIKA U BHRT-u

